

Nos morts



Maria Hitz-Berther, Rueras

Ils 29 d'avrel ei in numerus pievel radunaus en baselia da s. Vigeli per prender cumiau dalla carezada e buna mumma, tatta e basatta sco era preziosa convischina e concartenta, che Dieus, il Signur sur veta e mort, ha clamau ord questa veta terrestre a casa en siu reginavel. Suenter ina veta emplenida da lavour, orazion e quitau per ils ses, eis ella spartida da nus gievgia, ils 25 d'avrel suenter in liung temps da maldispostadad, bein preparada pil viadi en la biala vegliadetgna da prest 85 onns.

La Maria ei naschida sco tiarza feglia da Baseli e Mariuschla Berther-Gieriet ils 28 da matg 1917 a Dieri. Leu ha ella passentau cun ses diesch fargliuns ina biala e sulegliva affonza.

La scola ha ella frequentau a Rueras. Il viadi da Dieri viers Rueras era buc adina emperneivels, principalmein igl unviern da neiv e cuflas. Il resti ed oravontut ils calzers eran da gliez temps buca adina dalla megliera qualitat.

Igl emprendissadi sco cusunza da vestgadira dad umens ha ella frequentau a Mustér. Da quei temps secapeva ei da sesez, ch'ins stueva aunc gidar a far il percasa sper gl'emprendissadi. Malgrad il magher daner da sac, parteva la Maria quel cun siu frar che mava il medem temps a scola sin claustra.

Suenter gl'emprendissadi ha la trapassada stuiu bandunar sia cara patria e serender a Thun. Leu ha ella empriu d'enconuscher il schar encrescher. Ella anflava la megliera consolazion, mirond sin la glina, beinsavend che tala seigi la medema sco a casa.

Ils 25 da schaner 1945, pia cuort suenter la secunda uiara mondiala, ei Maria maridada cun il giuven Toni Hitz da Rueras. Dieus benedescha la ventireivla lètg cun 8 affons, 5 buobs e 3 buobas, per ils quals la Maria ei stada ina buna mumma cun bien quitau ed educazion cunscienziusa e religiusa. Ina tala famiglia ha purtau bia legria

e plaschers, denton segiramein era quitaus e fastedis. Ins sa strusch s'imaginar co la defuncta ha giu peda sper quei enorm pensum da lavur cun la famiglia, affons, stizun e puresser, da cuser tut il resti per ils ses. Ella ha denton mai selamentau e fatg quei cun plascher e dun. Bugen raquintava la defuncta a ses affons e pli tard als beadis bialas sco era fascinotas praulas, gie praulas cun in cert coc, che restan ad in e scadin aunc oz en buna regurdientscha. Tatta era ella cun tgierp ed olma. Ses 23 beadis havevan bugen ella.

In dils pli grevs pass en la veta dalla defuncta ei segiramein stau da stuer bandunar la casa paterna e serender en la casa s. Vigeli a Sedrun. La Maria scheva encrescher enorm per siu vitg nativ. En casa s. Vigeli ha ella saviu passentar mo in cuort temps ensemen cun siu mariu Toni. Memia spert ha el priu cumiau dil mund terrester e bandunau la Maria, quei ch'eis stau per ella ina greva frida. Il schar encrescher pigl um ha priu dad ella las davosas forzas. Dapi quei di da cumiau dil Toni, ha la Maria giu da sbatter cun pliras fleivlezias, dallas qualas ella ei mai propri serevegnida.

La grondiusa tgira en casa s. Vigeli ha gidau e levgjau ad ella quei grev temps. Las famiglias en malencurada engrazian da cor a tuts quels che han fatg dil bien alla defuncta.

La defuncta ha astgau mirar anavos sin ina veta cumplenida, far bilanza e scriver en sias reminiscenzas. «Cun agid da Diu hai jeu saviu viver ina biala veta.»

Ella rruaussi en pasch!

Norbert Vinzens